



KOMUNIKADO PA PRENSA

TEMPORADA DI ORKAN 2014 A TERMINÁ

Manera a ser antisipá dor di algun eksperto na prinsipalmente Merka, Temporada di Orkan 2014 a bira un temporada ku relativamente tiki aktividad. For di final di 2013, e ekspertonan di *Colorado State University* a antisipá e falta di aktividad aki i e motibu prinsipal tabata ku temperatura di laman den e sekshon ekuatorio di Osean Pasífiko Oriental i Sentral lo a bira mas haltu ku kustumber. E fenómeno aki, mihó konosí komo *El Niño*, especialmente durante di di dos mitar di 2014 mester a bai resultá den biantunan fuerte na nivel haltu di atmósfera, ku ta impedí desaroyo di siklon tropikal riba Osean Atlántiko, Laman Karibe i Golfo di Mexico.

A dura eksaktamente un luna pa e promé siklon tropikal di temporada forma riba Osean Atlántiko, djis ost di kosta oriental di estado Florida na Merka. Despues ku dia 1 di yúli, Depreshon Tropikal *Unu* a forma, e sistema aki a intensifiká un dia despues i bira Tormenta Tropikal *Arthur*. Denter di 24 ora despues di esei, *Arthur* a bira un orkan i a pasa riba kosta di estado North Carolina, kaminda tabatin un tiki daño kousá dor di e sistema aki. *Arthur* a sigui move den direkshon nort pa nortost i riba 5 di yúli e sistema aki a debilitá pegá ku kosta di e provinsia Nova Scotia na Canada.

Despues di esei, dia 21 di yúli a forma e di dos depreshon tropikal di temporada riba Osean Atlántiko tropikal, mei mei entre di kosta wèst di Afrika i Área di Karibe. E sistema aki despues di dos dia a debilitá atrobe. Durante di anochi di 31 di yúli, Tormenta Tropikal *Bertha* a forma riba parti wèst di Atlántiko tropikal na algun shen kilometer ost di e islanan mas oriental di Área di Karibe. E sistema aki a pasa drenta parti oriental di Laman Karibe djis nort di Martinique durante di anochi di 1 di ougùstus i a pasa na un distansha suficiente leu sùit di St. Eustatius i Saba, di manera ku no tabata nesesario pa emití vigilansha òf atvertensha pa e islanan aki. Tres dia despues, *Bertha* a bira brevemente un orkan, pero a debilitá bèk na un tormenta tropikal denter di un dia.

E siguiente sistemanan, Orkan *Cristobal* riba parti wèst di Atlántiko entre di 23 i 29 di ougùstus i Tormenta Tropikal *Dolly* riba Golfo di Mexico entre di 1 i 3 di sèptèmber no tabata di importansha pa e islanan den Karibe. Mesun kos ta konta tambe pa Orkan *Edouard* riba parti sentral di Osean Atlántiko entre di 11 i 19 di sèptèmber i Orkan *Fay*, ku tabata aktivo riba parti wèst di Atlántiko entre di 10 i 13 di òktober.

E siguiente siklon tropikal, Orkan *Gonzalo*, sí tabatin un impakto signifkante riba Sint Maarten, Sint Eustatius i Saba. E sistema aki a forma riba 12 di òktober for di un ola tropikal djis un par di shen kilometer ost di Guadeloupe. Servisio Meteorológiko Kòrsou, den koordinashon ku *National Hurricane Center* na Miami, a emití mes ora un atvertensha di tormenta tropikal pa Sint Eustatius i Saba. *Gonzalo* denter di apénas un dia i mei a intensifiká rápidamente for di un área suak di preshon abou te na un orkan. E sistema aki a bira orkan (kategoria 1) nèt ora ku su sentro tabata pasando hopi serka di Sint Maarten. E impakto di *Gonzalo* riba Sint Eustatius i Saba tabata hopi ménos kompará ku riba Sint Maarten i kasi no tabatin daño riba e dos promé islanan aki. E biantunan mas fuerte ku a midí den ráfaga na F.D. Roosevelt Airport na Sint Eustatius tabata 83 km/ora. Na Airopuerto Juliana di Sint Maarten, e ráfaga mas fuerte a alkansá 128 km/ora. Dos dia despues di a pasa banda di Islariba, *Gonzalo* a bira un orkan fuerte riba parti wèst di Atlántiko. E sistema aki a pasa hopi serka di Bermuda durante di anochi di 17 di òktober pero a kousa solamente algun daño menor riba e isla aki.

E último tormenta tropikal di temporada tabata *Hanna* ku a forma riba 28 di òktober parti ekstremo wèst di Laman Karibe, djis pariba di kosta di Honduras, banda di frontera ku Nicaragua. Denter di un par di ora ku *Hanna* a forma, el'a subi tera i debilitá rápidamente.

Na tur tabatin durante di e temporada di orkan 2014 formashon di ocho tormenta tropikal. Seis di nan a bira orkan i dos di esakinan a bira orkan fuerte (kategoria tres òf mas). E energia akumulá di tur e sistemanan aki huntu tabata apénas 63% di e promedio pa e periodo di 1981 pa 2010.

Apesar di ku temporada di orkan a terminá ofisialmente, Servisio Meteorológiko lo sigui monitoriá wer den nos region pa formashon di kualke disturbio. Den kaso ku esei ta nesesario, lo emití atvertensha pa públiko i outoridatnan di e islanan pa kua e servisio aki ta responsabel.

Riba e potrèt (siguiente página) por mira un parti di e daño ku Orkan Gonzalo a kousa na Sint Maarten.

